



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim


tiryimiyim@aolima

tir yimiyim

TAPAK 7

**June 25 ya 'Samvidhaan Hatya Diwas' anogomong asütsü: Amit Shah**

**Biden dang US tir atema metokteptsü ashir tali akumer**



VOL. XXI ISSUE NO. 271 (ADOK 271) DIMAPUR KÜPTOKNÜ (SATURDAY) CHITENI (JULY) 13, 2024 ₹ 5.00

## Vellore nung Naga Patient Home yanglutsü rongshir

**Dimapur, July 12, 2024 (TYO):** Nagaland Chief Minister dang asür Rev. Dr. Noksangchila nungtem nung Vellore Naga Patient Home yanglutsü atema mepishia shidi ka züluogo.

Iba shidi ya Mokokchung nung Social Activist Bendang Imsong-i tanü July 12 nü züluogo aser pai iba shidi nung yimjak nung lemsatepa zülü.

Pai Chief Minister dang iba mapa inyaker dang nungi percentage deductions kecha mali aser Yisu Khrista tenung nung inyaksü ayongzükogo.

CMCH Vellore (Tamil Nadu) nung temang anepalutsü atema aoba BPL card holders aser arogo nung inyakertem Naga patient house nung angati dang anenzükdaktsütsü mepishir ta bendang Imsong-isa shidi nung shia lir.

Pai October 13, 2021 nung Nagaland Baptist Church Council (NBCC) dangi shidi ka nung CMCH Vellore nung Naga patient home ka yanglutsü atema shidi zülüa liasü. Tanü pai Chief Minister danga shirangertem len talang orr anenzüktsü atema CMCH Vellore (Tamil Nadu) nung Naga patient house ka yanglutsü atema nenshia züluogo.

Iba mapatong ya Nagaland nungi asür Rev. Dr. Noksangchila-i mezüing tenzük.

La CMCH Vellore nung Chaplain inyaksü mapa lenzüktsüba nungi iba mapatong tenzük. Naga nung rongnung CMCH Vellore nung la mezüingbuba Chaplain liasü aser lai 1988 nungi 2001 tashi iba mapa inyaka liasü, ta Bendang-i Chief Minister dang ashi.

North-East nung tetsürtem rongnung mezüingbuba Reverend angurji asür Noksangchila liasü aser lai sempet aika agizükogo. Asür Noksangchila-i nübor tenzükba mapa aika inyak aser lai Chummukedima nunga ABAM (Ao Baptist Arogo Mungdang) nem ali tenlaogo.

Vellore nung Naga patient home ka yanglutsü mangdang yur lai fund drive ka ayonga agidang Rs. 450,000 bendenteta liasü aser iba sen jagi 2001 kum CMCH Vellore compound nung NBCC tenung nung kimung ka aliogo ta Bendang Imsong-isa ashi.

Ajisüaka nisung shingai asür Rev. Dr. Noksangchila indang mangdang ataloktsüsa mapa meinyakba atema temulung raksar anungji nai (Chief Minister) tekaratiba nung teinyaksü mapatem inyaksü mepishir aser iba Naga patient home ya asür Noksangchila nungtem nung jaloktsütsü mepishir ta Bendang Imsong-isa ashi.

## Supongmeren-i Naga nung onük benoka jembitsü

**Kohima, July 12, 2024 (TYO):** Parliament budget session nung Naga yimten tebilemstsü aser Eastern Nagaland nung khurettem benoka jembitsü ta Nagaland nungi Lok Sabha MP S. Supongmeren Jamir-i ashi.

Congress Bhavan nung osangbener den jembidang tawa Parliament special session ka agi aser iba nung ruling NDA-i opposition züngsemtem nem o jembitsü memela ta Supongmeren-i ashi.

Ajisüaka July 22 nungi August 12 tashi Parliament budget session 2024-25 alidang linük matsüingdang Naga nung tebilemba lemsateptsü maongka angutsü imlar ta pai ashi.

"Centre-i 2015 nung NSCN-IM den Framework Agreement

aser 2017 nung Working Committee, Naga National Political Groups den Agreed Position sign sütepaka Naga yimten tebilemstsü ano metembangtet lir anungji maongka ngura iba onük jembitsü" ta Supongmeren-isa ashi.

Maneni, paisa Eastern Nagaland Peoples' Organisation (ENPO)-i 2010 nungi Frontier Nagaland Territory meshiba onük benoka jembitsü ta ashi.

Centre aser Naga yimten teloktem tsüingda ceasefire agreements agitepa lir anungji Armed Forces Special Powers Act (AFSPA) kübok Nagaland medendaktsütsü atema MP Supongmeren-isa Centre dang mepishitsü ta ashi.

## ENPO mendenpurtem melentepogo

**Dimapur, July 12, 2024 (TYO):** July 12, 2024 nü Eastern Nagaland People's Organisation (ENPO) mendenpurtem menden melentepogo.

Hokolbarnü Hotel Saramati nung iba sentong agia liasü aser iba sülen osangbener den jembidang ENPO Tir tasenba A. Chingmak Chang-i tesüiba ketdangpurtemi inyaka aruba mapa tejakleni bener aotsü ta

ashi. "ENPO ketdangpurtem melentepa inyaka aotsü saka onok indang tebilemstsüji tasen masü anungji koma inyaka aru iba amaji onoki inyaka aotsü" ta Chingmak-i ashi.

ENPO tir menden toktsür R Taspikiu Sangtam-ia ashiba agi pai menden toktsü yonga ENPO nung züngsem ka asütsü anungji kechi teinyaksü lir inyaka aotsü.

## Lok Sabha nung takok anguba atema NPCC-i sentong ayongzükaga agi



**Kohima, July 12, 2024 (TYO):** Nagaland Pradesh Congress Committee (NPCC) president S. Supongmeren Jamir-i Lok Sabha election nung takok anguba atema NPCC-i tepela agütsüba sentong ka ayongzükaga agiogo.

Nagaland atema AICC secretary in-charge Ranajit Mukherjee-i o jembidang Nagaland nung Congress züngsem ajak nem tenügang agütsü.

"Congress nem takok ngudaktsüba atema vote enoktsür ajak dang pelar. Centre nung Congress sorkar maru saka Parliament nung menden teimba akümba ajanga tashitaiba kümogo. Centre nung BJP-i sorkar kümogo saka parnoki menden 400 alizüing metongtet anungji parnoki takoksa nguogo" ta Ranajit Mukherjee-i ashi.

Nagaland nung Congress president-i takok anguba nung Rahul Gandhi'er Bharat Jodo Yatra ajanga tongti shilem agi. Nagaland nung Lok Sabha election ya David aser Goliath tsüingda rara ama liasü, ta pai ashi.

"Onoki yatra ajanga Nagaland nung alirtem den tesentaktep yanglu aser ano tan election nung yimtsüingtem aser arogotemi clean & fair election maparen inyakba ajanga tashiyim agi yimsü asüba BJP madak takok

angu" ta Ranajit-isa ashi. "BJP-i aniba NDA sorkari Naga yimten asoshi lemtet kecha magiba aitsür. Parnoki iba tebilemstsü koktettsü atema temulung magütsür aser Manipur tebilemstsü atemaa kecha meinyaker" ta paisa ashi.

Taküm election nung Congress-i North East region nung menden 4 aliba nungi 7 kümogo, ta paisa shisem.

Eastern Nagaland nungeri terenlok aginüba Congress-i pusemer aser parnok den külemi noktaker. ENPO tesem nung alirtem yaritsü atema party züngsemtemi mapa inyaksü mepishir ta Mukherjee-isa metetdaktüsü.

"Linük nung Congress ya secular party tajungtiba ta teimla nung nübortemi kü nem takok ngudaktsü. Congress-i ruling sorkar madak takok anguba ta Tsüingremer sayatenya lir" ta Lok Sabha MP Supongmeren Jamir-i ashi.

"Onoki election campaign nung nangzükba ama onok indang tebilemstsüji ajemalua nübortem tenzüktsüba lir. Nagaland nung Congress party ateam tenung tajung bentsür arutsü asoshi onoki inyaksü" ta pai ashi.

Congress dak metokmeperi aika alitsü akok anungji

nübortemi onok den tebilembatem lemsateptsü mepishir aser iba ajanga 2028 tashi nung Congress-i sorkar akümtsü nung yariteptsü, ta Supongmeren-isa ashi.

Taküm ULB elections nung Congress-i wards 42 nung toktep aser tenet nung takok nguogo. ULB nung takok anguba ya Congress asoshi rongsen tulu lir ta paisa ashi.

"2028 mission asoshi tayongzükbatem koktettsü atema party lennir ajaki züngsemtem jangjatsü aser maparen asüngtettsü nungdaker. Congress lennir ajaki bendanga agütsütsüla aser pei pei kinungertem anioktsüla. Nagaland nung Congress sorkar ka aginür" ta Supongmeren-i lennirtem ayongzük.

Iba sentong nung NPCC kübok Mahila, Youth, Seva Dal, NSUI, Minority Committee aser district unit temi MP Supongmeren nem tenügang agütsü.

Sentong nung mendenji NPCC vice president W. Akum liasü, State Chaplain Rev Yamyap Konyak-i temoatsü meshia sarasadem, NPCC working president Khriedi Theunuo-i tesentepertem pelaa agizük aser vice president Capt. GK Zhimomi-i anküp tepela o jemi.

## Nagaland sorkari 'white revolution' adokdaktüsü: Advisor Kinimi

**Dimapur, July 12, 2024 (TYO):** State sorkari National Policy on Dairy Development den külemi Nagaland nung 'white revolution' ka bener arutsü mapa inyaker ta Animal Husbandry and Veterinary Services Advisor Kazheto Kinimi-i ashi.

Hokolbarnü Mokokchung nung Marepkong Ward nung Mini Dairy Plant-cum-Dairy Farmers' Training Centre ka lapoktsüdang Advisor Kinimi-i iba ya metetdaktüsü.

"Tanü mera tila ka agiba ajanga tarutsü nung terenlok tulu angutsü kechiyong Nagaland nung milk, egg, poultry, livestock aser meat production nung asenok peritsüsa meinyaktet lir"

ta pai ashi.

Marepkong nung lapokba plant ya National Programme for Dairy Development kübok amenoker. Iba mapa ya Nagaland directorate of Animal Husbandry and Veterinary Services aser Nagaland State Dairy Cooperative Federation Ltd. Kohima ajanga inyak.

"Nagaland nung dairy farming atema lenmang sadema lapoka lir aser iba ajanga nisung aika nem mapa agütsütettsü. Anungji nübortem aser talisa lanurtemi iba wadang nung tetsüing ajemoka inyaksü ayongzük aser department-ia akokba tashi iba wadang nung entrepreneurs len

sayutsü aser yaritsü" ta Advisor Kinimi-isa ashi.

Paisa district balala nungi dairy farmers dang department nungitsü aser amalitepa yariteptsü mepishi.

Department-i kiojen amala yanglur saka department o dairy farmers külemi inyak nung dang rongsenketzüing renloka aotsü ta Kinimi-isa ashi.

Technical session nung General Manager, MDP, Dr. Sanen Jamir aser Project Director, NSDCF Ltd. Zapove Swuro nati "Fertility Management of Dairy Cattle" aser "Quality & Clean Milk Production" onüktem lemsatepa liasü.

# SCERT Nagaland-i diploma agir atema Graduation Day ayongzük



State Mission Director, Samagra Shiksha, Tamsunaro Jamir aser ketdangsürtem den 2019 & 2022 Batch Diploma Holders in School Counselling külemi SIEMAT Hall, Kohima nung tangokba noksa nung angur.

**Kohima, Chiteni/July 12 (TYO):** State Council of Educational Research & Training (SCERT) Nagaland ajanga 2019 & 2022 Batch Diploma Holders in School Counselling atema Graduation Day sentong ka SIEMAT Hall, Kohima nung Hokulbarnü ayongzükua liasü.

Tamsunaro Aier, State Mission Director, Samagra Shiksha, Nagaland ajanga tezüngzüktepa agi aser 2019 atema School Counselling nung graduated diploma angur nisung 32 aser 2022 batch nung nisung 21 nem diploma agüja liasü.

School Counselling Programme nung küm ka diploma takok ngua renemba tesayur ajunga nem Tamsunaro Aier-i tenüngsang agütsü aser iba course küm ka akumba sülen renemer batch mezüngbuba alitsü ta ashi.

Dr.Zavise Rume, Professor & Head, Counselling Cell SCERT aser par teloki bendanga agütsür ano alizüng ka tongteta School Counselling Programme tejakleni bener aoba atema lai tenüngsang agütsü.

“Kaketshir takum nung temelenshi lidaktsütsü asoshi küm ka bendanga agütsür meranga inyakba tanü tembanger,” ta lai ashi.

Teti melenshiba lima ka nung School Counsellor shilem ya tangsa tongtipangtiba kumogo, kechiaser nenoki kaketshirtem academic tebilemstü nungi aniteter, personal development aser mental health nung yarir, aser nisung ka takum melenshitsuüba kisüng masü saka asen nübürtem ajungtsü atema shilem agir, ta ashi.

National Education Policy (NEP) 2020 yagi kaketshir ka

rangben terenlok asoshi sayur aser kaketshirtem ya academic teyari dang masü saka socio-economic teyaria nungdaker ta sayur, ta State Mission Director, Samagra Shiksha ajanga ashi.

Tekolok, mulungsentsü mesüra yimyakoya nung tayongzükba balala ajangshia aliba kaketshir nem teyari agütsütsü mangdang yur kaket reju nung counselling services ya agütsür ta lai ashi.

“Kaketshir temi nungdakba teyari mapang shidak nung agütsütsü asoshi timtem kera jangjatetsü tongtipang aser in-service nung aliba tesayur tem School Counsellors akumtsü asoshi Professional Diploma Course in School Counselling tenzükba ya linük mezüngpur alitsü, ta ashi.

Diploma ngur alir temi kaketshir aika takum nung temelenshi bener arutsütetsü, ta lai ashi aser tanen makai angazüktsü ajungshia liasü.

“Temelenshi agizükang, kechiserna metetnüa liangm aser maneni tajungtiba atema inyakang. School counsellors ya profession ka dang masü saka lanurtem takum nung temelenshi bener arutsütsü tajaba ka lir,” ta Tamsunaro-i ashi.

Kasa sentong nung lai “Study on Naga traditional practice of socio - emotional expression” nungja agütsür aliba kaket ka saya, koba Professor Dr. Zavise Rume aser Joint Director, Kegwalo Thyug nati renema liasü.

School counselling nung diploma course agütsüba mapang Samagra Shiksha nungi senotsü teyari agütsüba atema Director, SCERT Nagaland, Kevirale-ii Kerhuo-i Tamsunaro dang pelaba lemsatepa liasü.

School counselling nung

practical training agütsütsü mapangdang nung iba diploma course ya SCERT Nagaland-i mezüng agütsür, ta lai ashi.

“Linük nung iba course mezüngbuba agütsür ka ama tanü asenok tejak tenteta nokdaka lir. State Cabinet ajanga tawa mulunga agizükba sülen course ya küm ka agütsü renem,” ta lai ashi.

SCERT Nagaland ajanga batch pezü buba nem iba course ya agüja tesayur 128-i Diploma course renema agiogo aser batch pongu buba tang tagidak lir.

“SCERT nungi graduate süa aliba Diploma holders ajunga atema pongunü Refresher’s Course ka ayongzüktsü,” ta lai ashi.

School counselling nung professional concepts tasenba inoka syllabus tajungtiba yanglutsü asoshi SCERT-i St. Joseph University Chümoukedima den lungjemer inyak, ta lai ashi.

“All Nagaland Counsellors Association teyari nung iba diploma course ya tai tajungba kumdaktsütsü nükjidorong lir. Onoki university recognition ngudaktsütsü meranger,” ta ashi.

Iba sentong nung Samlam Zeliang aser Khovelu Naro nati 2019 aser 2022 batch tenüng nung jembia liasü.

Iba sentong ya Medemmongla Jamir, Reader SCERT lenisüba kübok agi aser Dr. Naroti Jamir, Research Associate, SCERT Nagaland ajanga temeja ken ka aten.

Sentong tembanga Dr. Zavise Rume, Professor & Head, Guidance & Counselling Cell, SCERT ajanga melepzüng o jembia liasü.

# Mangkolemba nung Safai Apnao Bimari Bhagao sentong tenzük

**Dimapur, Chiteni/July 12 (TYO):** Safai Apnao Bimari Bhagao nungja agütsür Mangkolemba nung sentong ka tenzükua liasü. Stop Diarrhoea campaign den lirumedema iba mürekmejuba sentong ya July 12, 2024 nü ADC Conference Hall, Mangkolemba nung agia liasü.

Iba senden nung ADC Mangkolemba, T. Lankonsen Tsanglao menden liasü aser 2026 tashinung yimitem jana-reja maliba jenjang tongtettsü nükjidorong nung Swacch Bharat Mission-Urban kübok Ministry of Housing & Urban Affairs (MOHUA) ajanga maparen balala inyakba jembia liasü.

Pai iba sentong takok angutsü atema ward ketdangsürtem, NGOs aser tawa shimba Mangkolemba Town Councillors iba maparen nung shilem agütsü nungdaker ta ashi.

Paisa sendaktepa aliba department tem dang iba drive mapang parnok nem nungloksüba mapa inyakba indang report agütsütsü tuyua liasü.

Senior Medical Officer, Community Health Centre (CHC) Mangkolemba, Dr. Sentiyenla-i saktü-pokshi

(diarrhoea) adokdaktsüba indang lemsatep aser iba tashidak prokshia aoba nungi azüoktsü mera tem lemsatepa liasü.

Iba tashidak agi menepa alirtem mapang shidak nung medical treatment nungdaker aser healthcare professionals nungi teyari agütsü tongtipang, ta lai ashi.

Iba den külemi campaign mapang Health and Family Welfare Department ajanga inyaksangshi balala inyaktsü sentong yanglua aliba metetdakja liasü.

Iba senden nung CDPO Mangkolemba, Mangkolemba Town councillors, PHED, SDAO, kaket reju, MTSU, MALT, GBs aser ward chairmen tem dena liasü.

Safai Apnao Bimari Bhagao nungya mürekmejuba sentong, advocacy, aser department balala tsüngta tesendaktep dena lir, koba Urban Local Bodies ajungai inyaktsü.

Iba nükjidorong ya meyi mapang mürekmejuba yimya temaba jenjangi ajungketa tashidak samadaktsütsü asoshi lir. Iba drive ya department balalai subdivisions kübok phase ana lemsar July 15 nungi August 31, 2024 tashi agütsü.

# Dimapur nung 21st Livestock Census indang training agi



**Dimapur, Chiteni/July 12 (TYO):** Nagaland, Mizoram, Manipur aser Tripura nungi State aser District Nodal Officers tem asoshi software application aser breed documentation dak rangloker 21st Livestock Census indang training ka Ministry of Fisheries, Animal Husbandry & Dairying ajanga July 12, 2024 nü Hotel Acacia, Dimapur nung agia liasü.

Iba training ya Department of Animal Husbandry & Veterinary Services, Nagaland tayonger liasü.

Iba sentong tenzükba mapang Department of Animal Husbandry & Dairying (DAHD), Government of India nungi Advisor (Statistics), Jagat Hazarika, ISS ajanga India nung Livestock Census ya 1919-1920 nung mezüng agia liasü ta ashi.

Iba sülen ibai küm pongu nung khen agia arur. Taküm linük tesem ajungalen September aser December ita tsüngta agütsü aliba census

mapang data tajungtiba nung bendentsü asoshi mobile app aser software densema State aser Union Territory ketdangsür nem nungdakba hadir agütsütsü nükjidorong nung iba training ya agir, ta pai ashi.

Tarutsü nung sentong balala tajungba kuma yanglushitsü aser animal husbandry sector nung sentong balala mapa kuma inyaktsü atema Livestock Welfare Programme yangluba nung livestock census ya kanga tongtipang lir, ta Hazarika-i ashi.

GVA I shilem pongu Livestock sector nungi lir aser aluyimba aser allied sector GVA nung livestock ajanga shilem agiba ya linük nung shilem 30 shi ajunger, ta pai ashi.

Pai training agirtem dang data bendenba indang angazüktsü aser census mapa takok ngua tajungtiba nung inyaktsü atema nungdakba yimya tem meteta alitsü ayongzükua liasü.

(Maneni tapak 8 nung...)



Hokulbarnü Lotha Hoho Ki, Dimapur nung ‘Safai Apnao, Bimari Bhagao’ tenzükba sentong nung tangokba noksa ka nung Administrator, Dimapur Municipal Council, W Manpai Phom; Dimapur Municipal Council chairman, Hukheto Yepthomi aser dangartem angur.

# केजरीवाल ने दिल्ली वालों को दिया महंगी बिजली का कट्ट



New Delhi, July 12, 2024: New Delhi nung electricity bill atuba anema longkak aitba sentong nung Delhi BJP Tir, Virendra Sachdeva-i jembidang tangokba noksa nung angur.

## June 25 ya 'Samvidhaan Hatya Diwas' anogomong asütsü: Amit Shah

New Delhi, Chiteni/July 12 (Agencies): Hokolbarnü Union Home Minister, Amit Shah-i, 1975 küm taoba mapang Ato kilonser, Indira Gandhi-i linük nung Emergency benokba atema Centre sorkari küm shia June 25 anogo ya 'Samvidhaan Hatya Diwas' anogomong asütsü teletetba agiogo, ta metetdaksü. Emergency benokba sülen taküm küm 49 ajungba küm ya India nung yimtenren nung mangatetep tulu adokba küm ka liasü. Taküm iba anogomong amongba sülen ita ka majungdang Centre sorkari June 25 anogo ya 'Samvidhaan Hatya Diwas' asütsü teletetba agir. Hokolbarnü Union Minister

Amit Shah-i X ajanga, "June 25, 1975 anogo nung taoba mapang Ato kilonser Indira Gandhi-i kijai tashi amshiba tangatetba sayua Emergency benokba ajanga asen linük democracy tanela tepseta liasü. Tai maket nisung lakh aika jail nung puok aser osangbenertem ola nembangia liasü," ta metetdaksü. "Iba anogomong nung 1975 küm Emergency mapang nung timtem ajangshirtemi shilem tajung agiba bilemteta amongtsü," ta paisa metetdaksü. Ato kilonser Narendra Modi yimsüsüba mapang piyong Congress aser tanga opposition party temi, ruling BJP-i linük temzüng alema inyaker aser linük temzüng kübok amenokba

reju balala tashimeiti kümdaktsür, ta aija arudar. 2024 Lok Sabha elections mapang nung Karnataka nungi BJP MP, Anant Kumar Hegde aser Meerut nungi BJP candidate, Arun Govil nati, linük temzüng yanglushitsü atema NDA-i menden 400 dak tema angutsü nükjidong yua lir, ta jembiba sülen nungi opposition-i asentenshir, BJP-i linük temzüng yanglushitsü meranger, ta aija liasü. Linük nung Emergency benokba sülen taküm June 25 nü küm 49 ajungba anogomong nung Ato kilonser Modi-i, Emergency benokertemi linük temzüng meimba indang jembitsü asoshi parnok dak temeden mali, ta metetdakja liasü.

## SC-i Delhi CM Arvind Kejriwal nem bail agütsü

New Delhi, Chiteni/July 12 (Agencies): Hokolbarnü Supreme Court-i Delhi excise policy ken o dak sendakba nung AAP tongti lenir aser Delhi Chief Minister, Arvind Kejriwal nem interim bail agütsüogo. Supreme Court-i, Kejriwal jail nung anogo 90 dak tali mongogo aser pa ya nüburtemi shimetba lenir ka lir, ta shia pa nem bail agütsü. Supreme Court nung Justice Sanjiv Khanna leniba bench-i Kejriwal nem bail agütsü aser pa apuba atema pai Enforcement Directorate (ED) anema temepishiba ken o agütsübaji bench tuluba kati angadangtsü lemtet. Obendang metetdaksüdang Justice Khanna-i, courts-i Kejriwal dang Chief Minister menden nungi alung ta ashitsü makok, iba teletetbaji pai dang agütsü akok, ta ashi. "Asüngdangyatsü atema dangbo pua ayutsü memelar," ta court-i metetdaksü. Delhi excise policy ken o nungsa Central Bureau of Investigation (CBI)-ia Kejriwal pua lir aser July 12 tashi judicial ket nung agüja liasü, anungji SC-i pa nem bail agütsüyonga pa

Hokolbar nüsabo mechiok. Taoba hopta Delhi High Court-i kasa ken o nung Kejriwal-i bail temepishiba agüja aliba dak sendakba nung CBI dang nungi telangzüba mshia liasü. July 17 nü Justice Neena Bansal Krishna-i Kejriwal indang bail temepishiba ken o angadangtsü. Supreme Court-i Kejriwal nem interim bail agütsüba sülen Kejriwal atema ken o jembitsür, advocate Vivek Jain-i, Supreme Court-i ozüng dak sendakba lenla balala reprangshidar, ta ashi. "2023 küm July-August nungi ED ket nung kuli liasü, ajisüaka kechiba pa taküm March nung ang apu? ta onoki Supreme Court nem metetdakja liasü. Court-i iba ken oji agizük asütsüa akok," ta advocate Vivek Jain-i metetdaksü. "ED ken o dak sendakba nung pa chiokogo. CBI ken o dak sendakbaji July 17 nü High Court nung angadangtsü. Iba mapang nungji onoki High Court dang pa tangsa chiokang, kechiyong CBI nung telatetba tesashi mali, ta ashitsü," ta Jain-isa metetdaksü.

## NATO summit mapang PM Modi-i Russia semdangba atema US jashir

New Delhi, July 12 (Agencies): Tawa Ato kilonser Narendar Modi-i Russia semdanga Russia Tir, Vladimir Putin ajuruba atema Joe Biden-i aniba US administration nung ketdangsertem aika mepelar, ta osang ka ajanga metetdaksü. Modi-i anogo ananü Russia semdangba mapang nung Modi-i, Russia ya mapang ajak nung medemer tajung ka lir ta jembia liasü. Iba mapang nungji Russia-i Modi nem Russia nung tematiba civilian award agüja liasü. NATO senden aliba mapang ka nung Modi-i Russia semdangba aser Putin tena azütepba noksa ka Putin-i lemsatepba ajanga US

ketdangsertem mepelar. July 9 nü US Tir, Joe Biden-i tenzüksüba NATO senden nung tongtibangtiba onükji Russia-i Ukraine amakba liasü. Russia-i Ukraine amak tenzüksüba sülen tang mezüng Ato kilonser Modi-i Russia semdangba atema America nung lenirtemi aitsür. US ketdangsertemi, Modi-i Russia semdangbaji Biden administration-i magizükteter aser NATO senden aliba mapang ka nung ang pai Russia semdangbaji tim masü, ta mepelai lemsatepogo. Osang ka ajanga ashiba agi, "July ita tetenzüklen Deputy Secretary of State, Kurt Campbell-i India Foreign

Secretary Vinay Kwatra dang Modi-Putin sendenji Nato senden den külemi magitsü atema anogo atsülangshitsü junger ta lemsatepa liasü." Campbell-isa Kwatra dang, US-i India aser Russia na mapang talangka nungi tesendaktep alibaji meteta dang lir aser Russia-China tesendaktep tajungba mekümdaktsüner ta shiogo. Ajisüaka Washington nung NATO lenirtem adenshia senden amenba mapang ka nung ang Modi-i Putin den senden amenbaji ajanga linüktemi Putin sendoktsü merangba mataloktsü aser US-i US-India tesendaktep tajungba kümner, ta Campbell-i lemsatepa liasü.



July 12, 2024 nü New Delhi nung Ministry of Education indang Shastri Bhavan kima All India Students Association (AISA) züngsem kati National Testing Agency (NTA) anema longkak aيتدang tangokba noksa nung angur.

## NDA sorkar ya chireptsüa akok: Mamata Banerjee

New Delhi, July 12 (Agencies): Hokolbarnü Trinamool Congress (TMC) tongti lenir aser West Bengal Chief Minister, Mamata Banerjee-i, Centre nung BJP-i aniba NDA sorkar tashimait anungji parnok kümsük tembanga malitsü akok, ta ashi. Hokolbarnü Mumbai kübok Bandra anasa Mamata Banerjee-i Shiv Sena (UBT) tongti lenir, Uddhav Thackeray'er ki semdanga pa ajurua liasü. Mamata-isa NCP (SP) Tir, Sharad Pawar-a ajuruogo. Thackeray den külemi osangbenertem den jembidang Mamata-i, "Iba sorkar ya chireptsüa akok. Iba sorkar ya tashimait," ta metetdaksü. "Asaya tenzükogo aser maneni asayatsü," ta laisa ashi. 1975 küm linük nung Emergency benokba atema Centre sorkari June 25 anogo ya 'Samvidhaan Hatya Diwas' anogomong asütsü teletetba agiba dak sendakba nung Mamata Banerjee-i, Emergency

mapang den kasa atishiteptsüa atalokba teimtibaji Ato kilonser Narendra Modi yimsüsüba mapang nung lir, ta ashi. West Bengal CM-isa, ozüng tasen asem - Bharatiya Nyaya Sanhita (BNS), Bharatiya Nagarik Suraksha Sanhita (BNSS) aser Bharatiya Sakshya Adhinyam (BSA) atema sorkari shinga den-a mejembitepi liasü, ta metetdaksü. Parliament nung MP tem aika anentsür aliba mapang nung ozüng tasen asem ya agizük, aser nisung aikati item ozüng tsübur, ta lai ashi. West Bengal nung opposition INDIA teloktep dak sendakba nung lai, TMC-i Communist Party of India (Marxist) den obang meputepteter, kechiyong lar party-i Left Front anema toktepba sülen takok ngua sorkar aküm, ta ashi. Shiv Sena (UBT) aser Banerjee-i aniba Trinamool Congress naprongla ya Opposition INDIA teloktep nung densema lir.



Jammu, July 12, 2024: Küm shia temeshi aini aoba 'Amarnath Yatra' nung shilem agitsü janrartemi tenüng zülüoktsü atema tarensena nokdaka aliba noksa nung angur.



# TIR YIMYIM

YIMOBILEM (EDITORIAL)

DIMAPUR

KÜPTOKNÜ

CHITENI 13, 2024

## Tanur aika asotsüla

Tang ya yakanü July 11 nungi tenzüka July 24 tashi alima ajunga nung nütsüing talirabo merenloktsüsa inyaktsü atema tangatetba agüja amongba mapang lir. Iba hapta ana agia amongba mapang ya tanur aika masotsüsa kibong menur akümtsü aser tanur ana tsüingda küm ana asembo lia asotsü aser akok tashi kibong nung tanur ka mesüra ana dak tali masotsüsa kümdanga medemtsü aser tanur aika masotsüsa tanur abenba lenmanga shibangadoktsü asoshi tangatetba agütsütsü aser inyakyim tapu balala sayua amongtsü. Atangji, nisung ka timtema alitsüa aser jangratema alitsüa pei kibong nungi tenzüker. Aji oda, kibong ka nung tanur aika sodena yur junga anepalu mesütet aser mazüoktet indaktsüba agi tanurtemji tamajung küma aoer. Atangji, tanur ka dang asoyonga tsüraburi junga mesayutetra loktiliba nung takidak maka akümtsü aser yimten nüken belemdaksür asütsü. Anungji, kibong nung tanur kwi aso ta asübaji masü saka koma azüoker aser koma sayuteter ta asübajiang tongtibangba akümer. Tanü alima nung nütsüing yongsük ajak agi billion 8.2 lir ta sükdangteter. Ibaji asenoki angatetsüba züngya nungbo nisung crore 820 asütsü. Item rongnung India kisüing nung nütsüing yongsük crore 144 lir aser China nung nütsüing crore 140 shi lir, anungji tangbo alima nung nütsüing teimtiba alima limaji India kümogo. Aji oda, tang nütsüing renlokba den kasa jenjang nung renloka ao nungbo küm 50 sülenbo alima nung nütsüing yongsük ya crore meyirijang ka dak tali küma züiner alitsü. Atangji, alima nung inyakba mapa kechisarina ajak nung nütsüing nungdaker, ajisüaka pei kibong nung tanur memesütetsüsa sodenra aser linük nunga yimten rongsen agi aser linük nung adokba tachitajemtsü agia meperitsüsa kümadokra, nübertem rongnungji ashir-auer aser ozüing raksar adoktsü aser loktiliba süngjema melitetsü. Iba jagi nütsüing aika ser tebok masüing teti raratepa alitsü agibo nütsüing ishika ser anüing-apong mesüi pelatepa ali tajungba ta Alima Nütsüing anogo amongba sentong yagi angatetdaksüner. Iba tangatetsü sayutsüing o ji asenok asoshisa tongtibangba, kechiyong asenokbo kidang kibong nung kati inyakba agi kibong rangben mesüba kibongtema aika lir, ano kibong aika nung mapa inyaker kata mali shibai kechi nungi kechi bener arua mesüar memetet aser mejangjaba kibongtema lir. Item nung jagi ozüing raksar adoker aser alima asoshi meinperongtsüka akümer. Akhi mapangbo asen tsüraburtem kibong nung tanur tuku ter daka tali soa mesütet. Iba jagiang tanü asenok nütsüing nebo tera züina kümogo. Ajisüaka, akhi mapang den tanü putu mapang medemdangtsüla masü, kechiyong akhi mapangbo tanurtem kaketrejui meyok, anungji tera tain kümerbo tanurtemji ki aser alu mapa nung tsüraburtem yarir aküm. Ibaji dang masü saka akhi mapangbo tanurtem süoshi aser chiyongtsü nung sen kangabo meindoki mesütet. Ibayongji, kidang tasor temang mapa inyaker aküm, anungji nübener kibongiang alua tuluba yimtet aser süa achitsüsa takar aküm. Ajisüaka, tanübo kibong nung tasor temang tila asüdang nungi kibong aküm meshia tashi kecha meinyakdaksüi kaketshisatsü bushidaksür, anungji tanurtemji kidang tsürabur yarir masü saka tsüraburtemiang tatem tashi yaritsüsa akümer. Aji oda, asenoka ibaji angatetertermi tanur ka mesüra ana sorbo anenadoker. Iba jagi tanübo asenok nütsüing kanga ajema kümogo. Ibaji dang masü saka tanü asüngsa balaka kibong lanu aika nung tanur masor, anungji asenokbo tanur ka ana sor anenadoktsübaji masü saka tesotetertermibo akok tashi akhi tsüraburtem ama tanur aika asotsü asoshi ajungshiteptsübajiang nungdak akümer. Atangji, tanur ajema asotsü ajungshitepba hapta nung tanur aika asotsü ajungshitsübaji tim masü saka asen lima yabo tangar lima ama masü, alimabo tuluka saka nütsüing kanga ajema lir, anungji nütsüing züin nung dang asenoki bilemba tongteta temoatsü agitettsü. Atangji, tanur ishika aika ta masü saka jungjunga anepalua mesütetsü asü masü ta asübajiang tsüraburtem asoshi tongtibang asütsü. Iba tangatetba nung, asenok meranga inyaktsüsa akümer aser tanurtema mapa inyaka azüingba sentong aser inyakyim ka alitsü nungdaker.

## OLEMSABANG

### Tanü asen loktiliba nung ajuruba tebilemstsütem

L. Kika Pongener.

(Yashi adok nungi...)

Lennir shiba sudir suaka, pei tenzüka mapang kümsuk (Term) temerbo sodi agitsü, saka loktijibo teti alitsü. Lokti ka liromedema anitsü atema, tensa mapang den apet temzüing-ozüing aser inyakyim yanglua ayur. Lokti ka anitsüba inyakyimji züngsem kar dak, mesura lennirtem dak rangloker kar ajangzüktsü apia lateta mayur. Anungji asen tenzüka mapang nung, lokti temzüing-ozüing aser inyakyimji asen aginulen asaa lateta ayutsü lennir shinga-ia memerangtsüla. Akok tashi lokti-i lateta ayuba temzüing aser inyakyim nungji lennirtemi anir züngsem ajaki tashi anga-a anidaktetsüla.

Kanga tesasatsüka, tanü asen lima nung loktiliba aika nung ochi agi kanga anungakonger. Lokti nung lennir aikati ochi paitoker metetsümonga kirak-kishia telemtetba agir...!!! Ano kangasa tesasatsüka, lokti aika nung nisung kar pei ajangzüktsü arishidang, jakdak-jakdaka tiyazü küli agütsür...!!! Otsüla-oboula nungeri jembia aruba...Yimden sabang nung/yimjak nung jakdaka-jakdaka tiyazü külisur aser tiyazü jembirbo medemsur aser mazük-marur. Tsüngrem o-ia ashir... "Tiyazü küli memerenshii malitsü aser tiyazü jembirji samatsü" (A.Shin-19:9). Ano kanga tesasatsüka, lennir karbo temeli ana adenba aser anatsü-nok lir. Iba amala lennir dangji yimden nung nuktapangdar ta ajar. Lokti nung lennir kati...Hau sura hau aser nunga sura nunga ta indang-indanga shitetsüla. Tanü putu ya tashitetmeteter putu ka asünung, lokti ajak nung lennirtemji tashitetmeteter tang lir. Anungji tashitetmeteter lokti ka ama kechi telemtetba agidir agiaka, tangar menudong masütsüsa kanga ret-reta telemtetba agitsüla. Tashitetmeteter lokti ka kari asüm (Drum) atemdak tsüngsangba, mesura kari lisu sentaker atsüshidang jokshishia tsüngsangba 'Puppet' ka amai masütsüla. Tejen putu nung, Israel nung otsü nung, Putir-i yimsu asüba mapang chuba shimdang...Putir-i totzü mezüja shimtet. Tanü putu nunga sorkar bangdak sabang nungi tenzüker, yimden yimsusuba sabang balala nung yimsusur asütsü shimdang...Yimden yimsusurtemi tenung-jalokja shimteter. Anungji yimsusurtemi Putir ka ama, Putir melena iba mapa inyakdang, iba ya khuret kanga tulu ta angateta, kanga dang anemponga aser asüngteta inyaktsüla. Aji oda, yimsusur/lennirtemi inyakbaji Tsüngrem-ia agizüktetsüsa aser alima nuburtem-ia shitaka ta agizüktetsüsa, mulongsentsü temeruk aser shisatsü tesadem agi inyaktsüla. Tsüngrem o-i ashir... "Parnoki chubatem shim, saka aji ni ajanga masü; Parnoki tongtipur shim, saka aji ni memetet" (Hosea-8:4). Kanga tesasatsüka, tanü loktiliba aika nung lennirtemi metetsümonga ochi paitoker kirak-kishia telemtetba agiba angudang nubur aika sungmanger...!!! Tsüngrem o-i ashir... "Nenok o mebendangtsüsa nenoki o tebandang; Kechiyong kechi obendang agi nenoki bendangdir, nenok o yamaji bendangtsü" (Mathi-7:1). Tanü asen lima aser nuburtemi supokrem nung meranglokba aser ochishir yimsusur aser lennir aginur.

- Yimozülur dangi -

Mrs. Meyisongla  
Rtd. Deputy Director Nursing  
Nagaland, Kohima.


20.6.24 Tir Yimyim Yimobilem nung. Asenok ya Modibar "AK" asü ta asüngdang lir kechiba?? Asen Aorbo "AK" tia den medendangar. Aki chiyongtsü tashi (Rotten) tzü temenen dang ajemer, scü-paika naji pa atema mojetsü ama nangnanga achir, pai lishitsüing nong belipshia tzü chuker, kilentsü aser jaka tamajung nong mapa meinyaki mejanga kazür tekulok mait, par chirtem pur aodang ngouk ngook ta ken anaben asar odang doktsür, bushia oa tayang mekepzür süra kodasür, asenok Modibar "AK" asütsü, oda Modiba jang Kg 5 agutsür senti vote alizüker. Nü birth rights shidakbabo ya India jang. Modijang masü, pa alu mayimer pa jang kong nongi? Aotsü aorji meshi metsür kinbo masü. Tejen putu yimsüsürtem. Rule agi kin shia nongi, kum tatakzü yimsü (Kum 30) südoktsür, lanu putu nem melenoktsü, sen agi vote mali ajaki junga yimsü asü.

Saka tanü asüngbo pi bendanger yimsü süba yimya "Election" agia yimsüsür shimmer sen aika aguja vote agiteper. Sentsü menoktsü atema ochishia yimsü mesüteter jajaba ya Exercise tajong asentsü asener, temang anema ali, Natsü aser tepok junga aor. Chiamonger, teperem masher, tekolak memener, yimya madonger. Amoi jonga aor tete pelaa alir. Tepela molungjangjimozü tajong. Tepela molungjang nung tashidak mamonger Blood pressure, sugar, Cancer free. Itemji asenoki angateti asen Aorji akhidang nongi pei züsentetba chia jema aru, meshimetsür kin masü meranga inyaker chiyongtsü tajong (Organic food) chia aruba kin, tangar shinga dak yimla melili azümesena melili. "AK" teai melili chitiongli, yi, drug lar mekümi.

N.B : June 23rd, 2024 nü tir yimyim adok Aotsü teptsü noksa 3. Tatempangba stanza nong Y.Yanger Imchen Aliba ta zülua alibaji T.Yanger Imchen Aliba ta azüngtsü mepeshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Pakistan nung Khristantem kiyimtsü atema küm telatet yanglushiogo



July 09, 2024 nü Pakistan National Assembly nung Khristan aser ruling Pakistan People's Party (PPP) nungi Naveed Aamir Jeeva-i Christian Marriage Act Amendment Bill benokdang tangokba noksa nung angur.

**July 12, 2024:** Pakistan national assembly nung akhidang British nung yimsüsüba mapang yangluba ozüing Christian Marriage Act yanglushiogo; joko Pakistan nung Khristantem kiyimtsü atema arrshi küm telatetji tajemba agia küm 18 bosa asütsü.

Iba ozüing yanglushiba pelaa agizüka Khristan lenirtemi, kibong akümtsü atema arrshi küm teimba kümtsüba ajanga anojungi kangshia kiyimdaksüba mesüra Khristan tetsür tanurtem anema inyakba mapatem anentsü, ta metetdaksü.

July 9, 2024 nü Pakistan assembly nung 1872 küm benokba ozüing yanglushiba bill ji agizük.

British nung yimsüsüba mapang nung Khristan teburtem arrshi küm 16 nungbo kibong akümtsü akok aser Khristan tetsürtem arrshi küm 13 nungbo kibong akümtsü temelaba agüja liasü. Ajisüaka tang Pakistan

assembly nung iba ozüing yanglushiba sülenbo Khristan tetsür-tebur ajak arrshi küm 18 abensaba sülen ang kibong akümtsü akok.

Bill tasenbaji Pakistan nung Punjab province nungi Khristan aser ruling Pakistan People's Party (PPP) nungi Naveed Aamir Jeeva-i benoka liasü.

Osangbener den jembidang Jeeva-i, "Sarasadem agi yariba den külemi onok nungitba aser ajungshiba atema ajak dang pelar," ta metetdaksü.

Tesüiba küm aika Khristan temeden atema inyakerter aser Arogo lenirtemi Pakistan nung Khristantem kibong akümtsü arrshi küm telatet teimba kümjang, ta takhangba agüja aruba sülen tang atangji nung Khristantem tebilemba atalokogo.

July 10 nü Catholic Bishops' Conference of Pakistan kübok National Commission for Justice and Peace (NCJP)-ia sangdong ka ajanga iba ozüing

yanglushibaji pelaa agizükogo.

Commission-i, assembly nung iba ozüing yanglushia agizükba ajanga Pakistan nung, talisa yimtsüngtem nung Khristan tetsürtem anojungi kangshia kibong kümdaksüba mesüra Islam yimsü dangi meyipdaksüba tebilemtsü anentsü, ta metetdaksü.

Pakistan nung Khristan tetsürtem puer aoba sülen kangshia Islam yimsü dangi yimsü meyipdaksür Muslim nung den kibong kümdaksür.

2023 küm kija nunga Pakistan nung Khristan aser Hindu tsür 101 shi puer ao aser parnok teimbaka Hindu tsürtem liasü, ta NCJP-i metetdaksü.

Pakistan nung tetsür shilem 18.3 bo arrshi küm 18 makümdang kibong akümer aser iba nungjagi shilem 3.6 bo arrshi küm 15 majungdang kibong kümdaksürtem lir.

Nütsüng million 241 aliba Pakistan linük nung nütsüng shilem 1.6 dang Khristantem lir.

# ANOGO ABEN TSÜNGREM DEN

## Parnok Tsüngremi aniba nung anidak

Parnoki parnok shisatsü nung mezüingbuba Tsüngrem tiyongtsü sūdaksür Pai aniba nung anidak. Messiah atema shinba parnoki koda angazük asenoki memetet. Tsüngremi parnok Kinü Yisu dangi anitsü ta amang., asenoki aji dang metet. Anüing nung aliba temangtem metetta alibaji shisa akar yimya liasü. Parnoki tasen Chuba asoba temaitsütem anogo aika anüing nung bushir alitsü südi. Petinui anibaji parnoki Tsüngrem temeyong agi parnok aniba ama parnoki agizük.

Tsüngremi aniba nai metetta lir ma? Iba ochi iba anogo nungi tanü tashi memelenshir lir. Shibai Tsüngremi aniba nung anidaker pa/la shidakba shisa taka lir. Anüdoklen nungi item tashi temetettertem nem leman atema mapa magütsü, parnok nem petinu dang ka agütsü. Parnoki tesangwaji dang anidak, aser ibaji asoshi Tsüngremi parnok dang pela. Kari ashir, "Tsüngremi mulungba talang nung lia metettsü asoshi asenok jilia talang ka orr atatsüla." Ibaji shidak masü! Tsüngremi asenok nem jili leman mesayur, saka Pai asenok mera shiaji anüker.

Pai ne leman anitsü, A. Shin züluri ashir (A. Shin 3:6). Tsüngremi Israel chirtem nem anüing mepet tongshi ka aser aonung mi tongshi ka parnok anitsü asoshi agütsü. Pai shisa kartem nem petinu dang ka agütsü. Tanü Pai asenok den yamaji meinyaker, saka asenok jakdang Pa aotsü Pai nangzüka lir. Asenoki Kibuba tsütsü mera ka aotsü mulungra Pai asenok tsütsü mera ana arutsü. Tanü shirnoki Tsüngremi aniba nung anidaker parnok shisa akartem lir.

# India nung Khristantem ano taliba reshikangshir: Open Doors

**July 12, 2024:** Alima tesem ajangshiba Khristantem yariba melungtet telok- Open Doors International-i, India nung minorities, talisa Khristantem anema inyakba kanga bulua akümba atema tebilemtsü akar, ta metetdaksü.

Open Doors International indang local partners ajanga ashiba agi, tawa election nung BJP-i majority mengutetba ajanga mangyangba inyakyim ka benshir asütsü akok, ta ashi.

Talisa June ita nung Uttar Pradesh nung Khristantem aika puogo.

June 7 nungi tenzüka June 23 tashi nung Uttar Pradesh nung pastor ana densema Khristan 14 puogo aser parnok teimbaka sarasadem sentong tagidak mapang local police-i apuba lir, ta Open Doors-i metetdaksü.

Tang India nung anti-conversion ozüing benoka aliba state 11 rongnung UP densema lir.

Open Doors partner kati, "Anti-conversion ozüingtem tim mesüi amshir aser tiyazü nung tai tonglokja Khristantem apur," ta metetdaksü.

Iba dak alia Uttar Pradesh nung court balalai obendang balala agütsüba ajanga aika ratamatar. Allahabad High Court-i, tamangba yimsü meyipbaji linük temzüing den

mapet ta ashir. Allahabad High Court-i, "Iba inyakyim melara iba linük nung nütsüng teimba alirtem kenü anogobo minority akümtsü. Iba ama tamangba yimsü meyipdaksüba yimsü teloktem tangsa anentsütsüla," ta ashi.

Ajisüaka Allahabad High Court indang obendangji May ita nung Supreme Court obendang denbo meputeper, kechiyong Supreme Court-i, Uttar Pradesh nung anti-conversion ozüing ya ajanga tamangba yimsü temeden anema inyaksüa akok, ta shiogo.

Open Doors-isa, India nung anti conversion ozüing benokba state 12bubaji Rajasthan akümtsü akok, kechiyong state sorkari iba ama ozüing ka benoktsü ta sangdongogo.

Khristantem atema tensa tamajungba akümba ya Uttar Pradesh aser Rajasthan na nung dang masü. June 24 nü Chhattisgarh nunga tribal Khristantemi Hindu nung telok balalai Khristantem anema inyakba anema longkak aika liasü.

Chhattisgarh nung nütsüng shilem 30 shibo tribal Khristantem lir aser iba state nung Hindu nationalist telok balalai Khristantem dang Hindu yimsü dangi tanaen meyiptsü rongshir.

# Clark Theological College Sunday atema sarasademsü ayongzüker

**Mokokchung, July 12 (TYO):** Clark Theological College (CTC) 1972 küm lapokba sülen taküm agi küm 52buba tashi Tsüngremi ajungketa moatsüba aser takok ngua anir aruba ya Arogotem, kija-kibongtem, ana aser talang nung aliba amangbapurtem sarasadem aser teyaritap ajanga lir ta meteta ajak dang pelaba metetdaksür aser Tsüngrem tenüing asanger, ta CTC Principal, Prof. Rev. Dr. A. Temjen Jamir-i sangdong ka nung metetdaksü.

Taküm-a CTC Sunday July 14, 2024 nung amongtsü asoshi sarasadema arudagi aser aser iba anogo nung sannüker aser tenzükertemi anir pei Arogo nung sentong tajung yanglua CTC wadang asoshi sarasadema den külemi mulungso tenla tajung bendentsütsü asoshi maneni mepishir, ta kasa sangdong ajanga metetdaksü.

Sarasadem nung bilemtettsü onüktem:

1. CTC Board of Governors, Patrons, Life Members, Founding Members, Co-Sponsors, Co-operating Churches, Trust,

Award aser Scholarship Sponsors taküm aser kibongtem asoshi sarasademsüdi.

2. CTC nung Faculty 25 aser staff 28 taküm, wadang aser kibongtem asoshi sarasademjangma.

3. Taküm (2024-2025) Academic Session asoshi ajak agi 445 students (DTh-10; MTh-74; BD-354; DCMM-7) register süa lir, parnok taküm aser tazüingba wadang asoshi sarasademjangma.

4. Taoba Academic Session (2023-2024) nung students 128 graduate süogo aser wadang balala nung tenzükdagi aser tang tashi nung CTC Alumni ajak agi 2,384 kümogo; parnok taküm, tenzükba wadang balala aser kibongtem asoshi sarasademjangma.

5. CTC nung Centre 4 (pezü) amenoka lir- Clark C for Leadership Development (CCLD), Clark Centre for Peace Research and Action (CCPA), Clark Communication and Cultural Research Centre (CCCRC) aser Clark Centre for North East India Studies (CCNEIS).

Item centre tem ajanga shisatsü bushirtem aika ajangzüka den külemi yimjung asoshi sentong, shisa tokten aser kaket balala adoka arudar. Item Centre tem asoshi sarasademjangma.

6. ABAM ajanga CTC nung temeja kaketnang (separate Library) ki ka asütsü asoshi telemtetba tajung agir iba Project ya Planning-cum-Construction Committee member tem nem nungloktüba ama kanga dang meranga tajungtiba nung inyakyonga arudar. Parnok taküm aser iba project mapa takok ngua inyaktettsü asoshi sarasademsüdi.

7. CTC Multi-Complex Building 2nd Floor (Auditorium) asütsü asoshi CTC Alumni Association ajanga seed money ' 50,00,000 (rupees fifty lakhs) yur, fund raise sentong balala agiyonga arudagi. Iba project takok angutsü asoshi nungdakba nübo aser rongsen Tsüngremi moajang ta sarasademsüdi.

8. Clark Centre for Leadership Development (CCLD) building 1st Floor asütsü asoshi sen teyari lenman lapokjang ta sarasademdi.

**AO OSHI ANGAZÜKDAK: TANÜ ANGAZÜKTSÜBA OJANG**



Tir Yimyim

**Tajentep**

- (v) metentepa yutsüdak (join)
- \* Menden yanglurtemi süng tajentep mengudaktsüi yanglur.

**Tajento**

- (n) ajenzülü tila, tajenpet (dot, misprint)
- \* Kaket nung tajento aika aliba agi ajak tajento kümer menüingshi.

**OLONG PAITEP # 6844**

		1				2			3
4									
				5					
6		7				8			9
				10					
	11								
12								13	
						14			
15									

**TIPIEN**

- 2. Meyoktep - 5
- 4. Teyira - 5
- 5. Aor tebur dang ajaba - 6
- 6. Timba angutsü merang - 6
- 10. Tebilemtsü - 6
- 12. Aochia bilemba - 6
- 14. Anenzüka anisüngzükdak - 5
- 15. \_\_\_\_\_ r - 5

**LANGTSÜNGLEN**

- 1. Nünü'er jala - 3
- 3. Endok-enra - 4
- 4. Tongti medemer - 6
- 5. Tekong nung azükba - 7
- 7. \_\_\_ an - 3
- 8. Oset abenba - 3
- 9. Ammang tesangwa - 6
- 11. Te\_ \_ \_ m - 4
- 13. Mesük - 3

**OLONG PAITEP # 6843 TELANGZİA**


**TIPIEN :**

- 1. Taa, 3. Teküm, 6. Aibelen, 7. Aut,
- 9. Ajzü, 10. Ojala, 11. Semer, 13. Sen,
- 15. Kioktsü, 17. Itsük, 18. Kar.

**LANGTSÜNGLEN :**

- 1. Tai, 2. Asensor, 3. Tanü, 4. Kua,
- 5. Mitsüksü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

**NAI-A YA METETTER MA**



Argentina-i 2024 Copa America final asayatsü jenjang atongba ajanga Lionel Messi-i alima otsü tasen ka yangluogo. Messi-i international tournaments balala tenet nung final atongba atema football nung putiotsü tasen ka yangluogo. Lionel Messi lenisüba kübok Argentina-i 2021 Copa América aser 2022 FIFA World Cup takok nguogo. La Liga nung Messi-i most goals (474), hat-tricks (36) aser assists (192) aser Copa América nung most appearances (36) aser assists (18) otsütem yangluteta lir.

**Clock tower atema Mahatma Gandhi kürakyanglu agienba magizüker**



**Tinsukia, July 12, 2024 (Agencies):** Tinsukia district kübok Doomdooa nung Mahatma Gandhi indang kürakyanglu ka agientsü lemteba atema nübertemi ashishiteper. Azüklen feet 5.5 talang kürakyanglu ya Gandhi Chowk nung mapang talangka nüngshilung ka ama ayur saka Clock Tower tasen ka yanglutsü atema tawa agienogo. Mahatma Gandhi indang

kürakyangluji excavator crane ka amshia agien aser idangji nübertemi lungkak aita liasü. Doomdooa nungi taoba mapang kümsük anaben tashi Congress MLA Durga Bhumi-i iba inyakyim anema ola adoker. "Mahatma Gandhi indang kürak yangluji akhi ama kasa tesem nung ayutsüla. Onoki iba tesem nung Clock Tower yanglutsü memelar" ta Bhumi-i ashi. Iba atema Doomdooa

BJP MLA Rupesh Gowala-i Brihostibarnü ita trok tsüngda kasa tesem nung Mahatma Gandhi indang kürakyanglu tasen ka yanglutsü nangzükogo. Iba ashishiteper ken o ya Assam chief minister Himanta Biswa Sarma-ia angashiogo. "District administration-i iba lemtet agiba ya ni memetet liasü. Ni osang jangjatepdi. Assam-i Mahatma Gandhi dang sentsüh aika lir" ta CM Sarma-i ashi.

**Manipur nungi mezüngbuba Supreme Court judge shim**

**Imphal/Shillong, July 12, 2024 (Agencies):** Supreme Court collegium-i Jammu & Kashmir aser Ladakh High Court nung Chief Justice inyaker Justice N Kotiswar Singh aser Madras High Court nung acting Chief Justice inyaker Justice R Mahadevan na Supreme Court nung inyaktsü junger ta shiogo. Justice Kotiswar Singh jenjang ajungketba ya Manipur atema kanga tongtipang lir kechiyong India nüjiso ngur küm 70 tema süia arurdang Supreme Court nung Manipur nunger mezüngbuba judge ji pa asütsü. SC collegium nung Chief Justice of India DY Chandrachud lenisüba kübok Justice Sanjiv Khanna, Justice Bhushan R Gavai, Justice Surya Kant aser Justice Hrishikesh Roy nunger lir. Supreme Court nung judge ajak agi 34 asütsüla saka tang parnok 32 dang lir.

Justice N Kotiswar Singh-i October 2011 nungi Gauhati High Court nung additional judge ama judicial career tenzük aser February 2023 nung Jammu & Kashmir and Ladakh High Court nung Chief Justice inyaktsü shima liasü. **Justice Tashi Rabstan-i Meghalaya high court CJ inyaktsü** Meghalaya High Court nung Chief Justice inyaktsü atema Justice Tashi Rabstan shimogo. Supreme Court Collegium-i ashiba nung ajemdaker pa shim. Meghalaya High Court nung tang teinyakdak Chief Justice, S Vaidyanathan August 24 nü mapa nungi sodi angutsü. Justice Rabstan ya Jammu and Kashmir aser Ladakh High Court nung senior-most judge lir aser Ladakh region nungi mezüngbuba Chief Justice inyakba putiotsü tasen ka yanglutsü lir.

"Justice Tashi Rabstan ya Ladakh nungi mezüng Chief Justice asütsü kechiyong iba tesem nungi High Court nungi Judges balaka mali aser Chief Justice office nunga nisung ka danga mali. Collegium-i pa Meghalaya High Court nung Chief Justice inyaktsü junger ta shidanger" ta SC Collegium-i metetdaktsü. Justice Rabstan ya April 10, 1963 nü Skurbuchan, Leh Ladakh nung aso aser Skurbuchan, Leh Ladakh nung LL.B. aser tanga academic qualifications azüng. 1990 nung pa Bar Council of Jammu & Kashmir nung züngsemba sülen legal career tenzük aser pai Jammu & Kashmir aser Ladakh High Court nung dang teimba inyaka aru. 2022 nung pai Jammu and Kashmir aser Ladakh High Court nung Acting Chief Justice inyakogo.

**Tamenglong aser Jiribam nungi non-locals meindoker**

**Imphal, July 12, 2024 (Agencies):** Tamenglong aser Jiribam district tem kübok yimtsüng kar nung non-local nisungtem yasüng telungpurtemi meindokogo. Iba jagi Hokolbarnü Jiribam district headquarters kübok tesem kar nung non-locals jenoka lir. Telungpurtem ya Kuki nunger ama temulung malemer aser parnok ya Tamenglong district kübok Mongbung hill ranges len nungi alu aser non-locals dang yimtsüng toktsür

aotsü tetuyuba agütsü. Iba jagi Tamenglong district kübok Jiribam district kübok Mongbung aser Saiyang yimtsüngtem nungi non-locals aika pei talidak yutsür ao. Item yimtsüng nung non-locals ki 17 shi lir. Iba tetuyuba agütsüba sülen yasüng 8:00 ako meta Mongbung aser Seijang yimtsüngtem nung injang khatokba ola angashia liasü. Iba sülen yasüng 9:00 ako aser ano tanep 12:10 ako meta injangtem khatoka liasü.

Iba atema yimdaklirtemi Hokolbarnü Jiribam police station nung ken o ka benokogo. Assam Rifles aser state police-i yimtsüngtem nükdar aser Meitei nunger local volunteers-ia tesem anüker. June 6, 2024 nü Kuki nunger telungpurtemi Meetei aluyimer ka tepsetba sülen Jiribam nung tensa mejungi aküm. Iba sülen Meetei nunger ki 150 shi rongdoktsü aser nisung 2,000 jungnua pei talidak toktsür ogo.

# Israel sepaitemi Gaza City amakba sülen ainshiogo

**Cairo, Chiteni/July 12 (Agencies):** Israel mitkar temi hopta ka shi amakba sülen Gaza City district kar nungi Brehostibar aonung ainshiogo, saka nisung aika takum sama, ki aser lenmang tem raksatsür lir, ta yangji alirtem aser rescue service ajanga Hokulbarnü ashi.

Hamas telungpur samatsütsü tenzüker ita ter junga rara arudang hopta ka shi Israel mitkari Gaza City nung kanga sashia amakba mapang US-i bhukumba mediators temi yimjung ken o jembia October 7 nü arütsü alema aita pua bener aortem chioktsü asoshia lenmang bushia liasü.

Gaza City kübok Tel Al-Hawa aser Sabra neighbourhood nung Israel

sepaitemi taoba hopta tepsetba Palestine nunger tasü mang 60 shi bendenogo, ta Gaza Civil Emergency Service ajanga ashi.

Tesem kar nungi tanks tem ainshiaka tesem aika nung Israeli snipers aser tanks tem lir aser yangji alirtem aser rescue team temi iba tesem nung aliba pei ki bushia marutsü tekumdangtsü ashir.

“Yimtung nung nisung tasü mang, tetsü ng-tepen prokshia lir, kibong ajunga indang tasü mang lir, ki ka telung nung kibong ka nungi zü ngsem ajunga indang tasü mag lir, koba okshia rongdokogo,” ta Gaza Strip Civil Defense odongtar Mahmoud Basal-i sangdong ka nung ashi.

Brehostibarnü Israel mitkari Gaza City nung Hamas capabilities raksatsütsü atema inyaker ta shia liasü aser parnoki international law sülen anidaker aser civilian tem timtem majurutsüsa inyaker ta ashi. Ajisü aka Hamas-i yamaji meinyaker ta ashi.

Hamas indang armed wings aser Islamic Jihad-i Israel sepaitem den kanga sashia rara aser parnok dak anti-tank rockets aser mortar amshia amak aser aika tepset aser yiru, ta ashi. Iba sangdong nung Israel mitkari telangzüba agüja mali.

Rara metenzükdang Gaza nung alir shilem pezü kuma lemdanger shilem ka dak tema Gaza City nungya liasü, saka

# Biden dang US tir atema metokteptsü ashir tali akumer



**Washington, Chiteni/July 12 (Agencies):** Joe Biden-i osangbener senden ka nung pa US tir asoshi tokteptsü junga lir ta nenshia shiaka par party nungi pa anemertem memesü zükteter.

Biden dang US tir menden asoshi toktepbpa nungi anendang ta ashirtem rongnung ano Democratic party nungi yimten yimsüsür asem densemogo.

Arishi küm 81 tain Biden-i taoba ita Republican telok nungi Donald Trump den TV nung o intepdang junga shilem magitetba sülen pa dang iba menden asoshi toktepbpa nungi ainshitsü asoshi akhangba tali akumer.

Brehostibar aonung ghonda ka osangbeneri asü ngdangba langzü dang pai tanemi aser tajungba nung langzü, saka o kamiba liasü.

Mezü ng asü ngdangba langzü dang pai aibelenba pa indang Vice President Kamala Harris dang “Vice President Trump” ta aja.

Aji masü dang ghonda ana tejakdang NATO sentong ka nung pai Ukraine Tir Volodymyr Zelenskyy metetpelaba mapang “President Putin” ta aja saka pai pasasa melenshia liasü.

Iba tetetzü Biden indang candidacy nung tang tashi timtem lir, aser ano anogo ishika tsü ngta zü ngsem aikati pa yutsütsü akok.

Actor George Clooney densema pa indang campaign nung senotsü tenla agütsür aikati pa yariba anenogo aser pai ano küm pezü kümsük ka abentsü metemsü ta ashir.

Tiri osangbener senden nung junga jembio, saka temulung melenshitsü sabo masü ta Biden dak tamang makateter tem jembitepa liasü, ta Democratic fundraiser kati ashi.

Tang nungi aoba nung Biden asoshi tebilemtsü kaji, sentong shia pa kanga asadangtsü.

Pai khen dang o kamiba mesüra aibelenba ajanga pa kümsük tanabuba atema tokteptsü metemsü ta kuli

amtsü. Pai osangbener senden tembanger mapang tatsüka lir Connecticut congressman Jim Himes-i social media X nung Biden-i nübur tenzü kba tenü ng asang saka campaign nungi anentsü ashi.

Trump ajanga timtem agütsüba den tokteptsü asoshi tashi taittiba candidate ya jokorla Joe Biden masü, ta pai zülutsü.

Illinois congressman Eric Sorensen-ia social media nung 2020 küm Biden-i party dang tama linük südaksütsü nü kjidong nung toktep, tanüa ni pa dang yamaji inyaksü asü ngdang, ta ashi.

California congressman Scott Peters-ia jenjang kanga tulu aser asenok tamakokleni aor, ta ashi.

Parnok ya ajanga Democratic politician temi Biden dang anentsü ashir nisung 19 kumogo.

Osangbener den jembidang Biden-i mapa renema inyaksü asoshi tokteper ta nenshia ashi.

Congress nung pa bhukumer aikati iba osangbener senden sülen pa sa candidate tajungtiba ta shia liasü.

“Asenoki menü ngdakba nung temulung kangabo magütsür asen jakdang aliba mapa nung rangloktsüla. Iba nisung yagi inyakogo, pai taoba mapanga inyaktetogo,” ta Democratic National Committee chairman Jaime Harrison-i ashi.

OFFICE OF THE  
**KANGTSUNG SENSO MUNG DANG**  
P.O. Tuli – 798618  
District : Mokokchung, Nagaland

**TENÜNGSANG AGÜTSÜR**

Taküm 2024 Urban Local Body (ULB) Election nung asen Kangtsung senso tajung - 1) Wb. Purtoshi, Shitikolak Ward, 2) Wt. Shilutila, Aitlenden Ward, nungi takok tulu ngutetba asoshi Kangtsung Senso Mungdang mendenti ajanga konang tetushi tulu agütsür aser Tsü ngrem tenü ng asanger. Nenok lenisüba kübok asen nübor tejakleni aotsü imlar. Tsü ngremi nenok taküm aser wadang moajangma.

Ano, Iba takok jenjang ajangzüktettsü asoshi mangdang yur sensosanger aser area sangertemi tangatetba aser tejangraba nung shilem tulu agia lenmang balala nung yaritepogo, nenok ajak danga kanga pelaba metetdaksür.

Maneni tarutsü anogotem nunga iba kasa tangatetba aser tejangraba tulu meremsepi ajungmesoa yaritepa inyakyimtsü yimla atar.

TSÜNGREMI NENOKAJAK MOAJANGMA.

Sd/- **S. IMDONG** Tir Kangtsung Senso Mungdang  
Sd/- **BENDANG IMSONG** Tongti Zülur Kangtsung Senso Mungdang

**DIMAPUR GOVERNMENT COLLEGE**  
ESTD. - 1966  
NAAC Accredited 'B+'  
(Affiliated to Nagaland University)

**ADMISSION 2024**

**POSTGRADUATE PROGRAMME (ARTS)**

**COURSES OFFERED: MASTER OF ARTS (M.A.) • EDUCATION**

For details information on eligibility criteria and others refer - [www.dimapurgovtcollege.in](http://www.dimapurgovtcollege.in)

**IMPORTANT DATES:**

- Filling of Admission Form Online (Registration) : 15<sup>th</sup> to 20<sup>th</sup> July 2024
- Entrance Test & Interview : 23<sup>rd</sup> July 2024
- Time of Entrance Test : 10:00 AM to 12:00 PM
- Interview : 1:00 PM onwards
- Venue of Entrance Test : Dimapur Government College
- Declaration of Selected List (College Website) : 26<sup>th</sup> July 2024
- Provisional Online Admission Declaration of 2<sup>nd</sup> List (Depending on availability of seats) : 27<sup>th</sup> - 29<sup>th</sup> July 2024
- Orientation and Commencement of Classes : 30<sup>th</sup> July 2024
- Selection Guide : Entrance Exam 70% & CUET 30%

**\*HELP DESK NUMBERS:**  
Monday to Saturday during office hours-10:00 AM -04:00 PM  
\* Admission Procedure & Entrance Test : 9863332524 | 9366127445 | 9366317208  
\* Technical Support for Online Application : 9366493332

**LOVELY CENTER**

IM Road, Mokokchung, Nagaland 798601  
Monday to Saturday 9:00 am - 6:00 pm

Free Home Delivery within Mokokchung. Coverage upto Chuchuyimpang, Ungma and Khensa on selected products

Reach us at :  
☎ 9863962926  
☎ 7630924365

Professional. Friendly. Reliable

# Nepal tzü metsü ng agi bus ana ponger ao, nisung 62 samar bushir

**Kathmandu, Chiteni/July 12 (Agencies):** Hokulbarnü Nepal nung alinen aluba ajanga bus ana anenzüker oa ayong nung tsükba sülen yangji mena alir nisung 62 samar bushir, ta ketdangsürtemi ashi.

Nepal yimtiba Kathmandu nungi anüolen tsütsü kilometre 86 shi pilar Chitwan district nung aliba Trishuli River nung

samar aliba nisung bushitsü atema ketdangsür temi military aser police personnel tem aika yoka lir.

“Bus ya tang tashi monguteter. Ayong nung tang tashi tzü kanga sashia tzü memürek ayimer, anungji samar aliba nisungtem bushitsü asaker,” ta district ketdangsür Antim Sinjali-i ashi.

Nü ngkumlen nungi long

aser lishi anenzüka maludang passenger asem bus nungi pongzüka liasü aser parnok temang nung tera yiruaka takum jenbu, ta Sinjali-i ashi.

Samar aliba passenger tem rongnung India nungera nisung tenet lir, ta pai ashi. Social media nung noksa tem prokshiba nunga tzü kanga kera ayimba ayong nung rong tila senzüba nguogo, saka tzü

ya sentsü mangmanga temoro liasü.

Kathmandu nungi anüolen tsütsü kilometre 150 shi pilar Kaski district nung alinen agi nisung aliba ki asem anenzüker aoba nunga nisung 11 asü, aser anasa Myagdi district nunga alinen alua nisung asem asü, ta police odongtar Dan Bahadur Karki-i ashi.

Nepal nung June ita

tiyonglen nungi meyi tzü nglu tesashi aruba ajanga alinen alua tzü metsü ng adokba nung nisung 91 takum samaogo.

Hokulbarnü social media post ka nung Ato Kilonser Pushpa Kamal Dahal-i iba lendong atalokba tejashi lemsatet aser sorkar indang agency balala dang search and rescue operations kanga junga agitsü tuyua liasü.

## A'ja Wilson-i 2024 ESPYs nung Best Athlete sempet angu



**BEST ATHLETE  
WOMEN'S SPORTS**  
A'JA WILSON, LAS VEGAS ACES

**Los Angeles, Chiteni/July 12 (Agencies):** Taoba kum indang Most Valuable Player meshimtetba asoshi Las Vegas Aces star A'ja Wilson jashia liasü.

Ajisüaka Brehostibarnü Los Angelens nung ESPY Awards nung la ya ya Best Athlete, Women's Sports shim. Wilson-i Iowa nung takok anguba mechi shimba Caitlin Clark, golfer Nelly Korda aser US Open winner Coco Gauff nung ajak ajangeta iba sempet ya angu.

Kansas City Chiefs quarterback Patrick Mahomes-i kumna buba Best Athlete, Men's Sports sempet ngua liasü.

Iba sentong nung Wilson dena meliasü saka lai video message ka yongba nung, "Yangji aliba kü gans tem dang pelar ta ashitsü maongka ni amajok nung meindoktsü. Nenok teyari medeni tanü ni iba jenjang metongtetla. Basketball masayaner tetsür chanu kati ESPY anguba ya konag onsara tulu," ta lai ashi.

Tennis asayar Serena

Williams lenisüba kübok iba sentong ya agia liasü aser Ciara-i ken ka aten.

Iba sentong nung mezüng sempet ya Juju Watkins nem agütsü, shibai Southern California nung freshman basketball season asoshi Best Breakthrough Athlete sempet agüja liasü.

Taoba ita Boston Celtics ajanga NBA titles ngutetba atema Jaylen Brown nung Best Championship Performance sempet agütsü aser Caitlin Clark nem Best Record-Breaking Performance sempet agüja liasü.

Prince Harry nem Pat Tillman Award for Service agüja liasü, koba mitkartem dak sendakba sempet ka lir.

Tillman ya NFL asayar ka liasü saka sepai akum aser kum 20 jakdang Afghanistan nung duty nung lia arishi kum 27 nung asü.

Kum ter jakdang Invictus Games ngutetba atema Prince Harry nem iba sempet ya agüja liasü.

## Wimbledon: Paolini aser Krejckikova final asayatsü

**Wimbledon, Chiteni/July 12 (Agencies):** Italy tsür Jasmine Paolini-i Honibarnü Wimbledon asayamung tetsür kija asaya final nung Barbora Krejckikova den asayatsü.

Brehostibarnü Centre Court nung ghonda ana ser minute 51 asayaba sülen Paolini-i Donna Vekic madak 2-6, 6-4, 7-6 (10/8) agi akok aser ibai Wimbledon otsü nung tetsür kija semi-final talangtiba asayaba alitsü.

Italy tsür rongnungi arishi kum 28 tain Paolini ya mezüngbuba grass-court Grand Slam indang final tongteteter alitsü.

Lai Czech tsür seed 31 buba nung aliba Krejckikova den final asayatsü, shibai danga semi-final ka nung 2022 champion Elena Rybakina madak 3-6, 6-3, 6-4 agi takok ngua liasü.

Ibai Paolini asoshi takok tulu alitsü, shibai anogo 15 jakdang Eastbourne matongdang grass nung Tour-level match kata mokoki liasü aser tesüiba mapang Wimbledon asayamung asem tashinung shilem agiba mapang first round nung dang tsüka liasü.

Lai taoba kum tashi Grand Slam nunga second round alema moteti liasü.

Ajisüaka Paolini asoshi 2024 kum ya balaka liasü, shibai French Open nunga Grand Slam final atong saka world number one Iga Swiatek-i tsükdaktsü.

Laia iba jenjang tonga asayatetba mamangteteter.

Serena Williams-i 2016 kum tongtetba sülen Roland Garros aser Wimbledon finals atonga tongtetba tetsür mezüngbubaji Paolini alitsü.

## Tanünga takok angurtem yamai alitsü:

**Best Comeback Athlete:** Simone Biles, gymnast

**Best Play:** Baltimore Ravens quarterback Lamar Jackson catches his own pass and runs with it on Jan. 28, 2024

**Muhammad Ali Sports Humanitarian Award:** Maui surfing community for its work after 2023 fires

**Sports Humanitarian Team of the Year:** Angel City FC

**Best Team:** South Carolina Gamecocks, NCAA women's basketball

**Best College Athlete, Women's Sports:** Caitlin Clark, Iowa basketball

**Best Athlete With a Disability:** Brenna Huckaby, snowboarding

**Best NFL Player:** Patrick Mahomes, Kansas City Chiefs

**Best MLB Player:** Shohei Ohtani, Los Angeles Angels/Dodgers

**Best NBA Player:** Luka Doncic, Dallas Mavericks

**Best WNBA Player:** A'ja Wilson, Las Vegas Aces

**Best Driver:** Max Verstappen, F1

**Best NHL Player:** Connor McDavid, Edmonton Oilers

**Best Golfer:** Scottie Scheffler

**Best College Athlete, Men's Sports:** Jayden Daniels, LSU football

**Best UFC Fighter:** Sean O'Malley

**Best Boxer:** Terence Crawford


**Best Soccer Player:** Kylian Mbappe, France/Paris Saint-Germain

**Best Tennis Player:** Coco Gauff

**Sports Philanthropist of the Year:** Boston Red Sox ownership (John Henry, Tom Werner and Larry Lucchino)

—Field Level Media

## Alcaraz-i Medvedev tsükdakja Wimbledon final tongogo



Carlos Alcaraz

**London, Chiteni/July 12 (Agencies):** Hokulbarnü Wimbledon tebur kija semi-final ka nung Carlos Alcaraz-i mezüng set nung tamakok ajuruaka temulung ajema meliee asayar 6-7(1) 6-3 6-4 6-4 agi Russia nung Daniil Medvedev tsükdakja final tongogo.

Iba asayamung nung pai aiben temulung ajak agi masayaba ajanga aiben pa den asayartem jenjang mesepa liasü.

Round tasembuba nung Fraces Tiafoe madak takok angutsü atema French Open champion yagi sets pongu nungdaka liasü aser round pezü

buba nung Ugo Humbert akoktsü atema sets pezü nungdaka liasü aser quarter-finals nunga tetenzüklen America nung Tommy Paul jenjang tajungba liasü.

Taoba kum kasa semifinal nung straight sets agi Alcaraz-i tsükdaktsüsang 2021 U.S Open champion Medvedev ajanga tiebreak nung mezüngbuba set agia liasü.

Saka seed pongu buba nung alisang Medvedev-i Spain nung Alcaraz amokbanga asayatsü amai alidang tenük meremshidang pai Russia nungba ket nungi match agiatoker liasü.

"Pai asaya amokbanger asaya aser pa indang serves tajung liasü. Ni atema kanga tasak liasü aser pai shots ajak nung tashi amshi," ta Alcaraz-i ashi, shibai Novak Djokovic mesüra Italy nung Lorenzo Musetti den final asayatsü.

Taoba kum iba asayamung final nung Alcaraz-i Djokovic madak takok ngua liasü.

## STATE OSANG : Tapak 2 nungi...

### Dimapur nung 21st Livestock...

Director, Economics & Statistics, Neidilhou Keditsu-i sentong nung jembidang, livestock census yagi livestock züngdangba angatetsü atema nungdakba data agütsür, sorkar sentongtem asadangteter aser tarutsü sentong yanglur, ta ashi.

Naga nung kibongtem rongsen lenmang atema livestock rearing ya kanga tongtipang lir, saka census data nung growth rate kanga majungba ajanga per capita income aser Gross State Domestic Product (GSDP) nung kingshir, ta pai ashi.

Nagaland indang GSDP nung livestock sector indang share ya kanga sashia ajema kuma 2013 kum shilem 7.31 aliba 2024 nung 2.19 dang kumogo, aser state indang economic security nung kongshir. Anungji policy tajung yanglua mapa kuma inyaktsü aser rongsenketzung aintsü atema 21st Livestock Census nung data shidak bendentsüla, ta Keditsu-i ajungshi.

Ministry of Fisheries, Animal Husbandry & Dairying ajanga iba ama training ayongzükba atema Director, Indian Council of Agricultural Research (ICAR)-National Bureau of Animal Genetic Resources (NBAGR), Dr. BP

Mishra-i pelaba lemsatsep aser enumerators dang ako tashi data shidak bendentsü ajungshia liasü.

Enumerators temi bendenba data nung danga department aser agency temi metaloker maparen balala inyaktsü, anungji temulung agüja angazüker mapa shidak inyaktsüla, ta pai ajungshia liasü.

Iba census ya livestock sector nung terenlok mapa inyaktsü atema kanga tongtipang lir aser iba ya ajanga sentong balala yanglua rongsen lemsatsür, ta Secretary, Department of Animal Husbandry & Veterinary Services, Y. Renbothung Tsopoe-i ashi.

Iba sentong ya Additional Director, Animal Husbandry & Veterinary Services, Dr. N Mhonchan Shitiri-i pela agizükba o jembia tenzük aser paisa Advisor, Animal Husbandry & Veterinary Services Kazheto Kinimi-i züluba osang zünga liasü.

Iba sentong ya Director, Animal Husbandry Services, DAHD, V.P. Singh, ISS ajanga melepzüng o jembia tembang.

Iba sentong nung Nagaland aser danga state tem nungi nisung 66 adenshia training agia liasü.

## BILEMDANGANG

"Taremzük aser tesüngjem ya tashi tulu lir."